

T 7970/2240(7)

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY

MAR 24 1958

神農本草經疏卷九

草部中品之下

總七十八種今疏其要者三十六種又移入木部一種果部一種菜部四種

艾葉

惡實

水萍

王瓜

地榆

大小薊

海藻

澤蘭地笋

昆布

防己

天麻

阿魏



高良薑

百部根

懷香子

款冬花

紅藍花

牡丹

京三稜

薑黃

青黛

鬱金

蘆薈

延胡索

肉豆蔻

補骨脂

縮砂蜜

蓬莪茂

白前

白藥子

莎草根

胡黃連

鱧腸

使君子

白豆蔻

剪草

藿香

木部
移入

豆蔻

果部
移入

假蘇

蘇

香薷

薄荷

已上菜
部移入

艾葉味苦微溫無毒主灸百病可作煎止下痢

吐血下部墜瘡婦人漏血利陰氣生肌肉辟風

寒使人有子作煎勿令見風

弘景搗汁止傷血
殺蛇蟲蘇恭止痢

血下血膿血痢主崩血金瘡安胎苦酒
作煎治癖大明治婦人帶下霍亂轉筋

疏○艾葉稟天地之陽氣以生故味苦微溫

熟則大熱可升可降其氣芳烈純陽之草也

故無毒入足太陰厥陰少陰三經燒則熱氣
內注通筋入骨故灸百病性能通竅辟惡殺
鬼精故止鬼擊吐血芳烈之氣必燥故主下
部墜瘡其治婦人漏血利陰氣生肌肉者皆
以之導引涼血補血藥爲用者也使人有子
蓋指氣血兩虛之人風寒乘虛入子宮不孕
者設也辟風寒其性辛溫也搗汁服止傷血
者生寒而兼辛散也殺虬蟲者辛而苦也主

衄血者傷寒邪熱鬱而不汗則發衄也風邪
入大腸則下血溼熱傷脾胃則下痢膿血煮
則上升故亦止崩漏也理金瘡血熱則行也
胎爲風寒之氣所犯則不安風寒散則胎自
安也苦酒作煎治癰甚良者殺蟲之功也治
婦人帶下溫中除溼而升也止霍亂轉筋者
因寒而得也爲治白帶之要藥調經之妙品
故婦人方多須之

王治參互

艾葉能灸百病陳久者良 入紅鉛蒸臍補
陽虛溫脾胃 治婦人月事不調血少無熱
證者同香附醋浸入四物湯加阿膠枳殼神
効 金匱要略婦人有漏下者有半產後下
血不絕者有妊娠下血者竝以膠艾湯主之
阿膠二兩艾葉二兩芍藥甘草各二兩當歸
地黃各三兩芍藥四兩水五升清酒五升煮

取三升內膠令消盡每溫酒一升日三服

妊娠產後血虛人作痢下血用膠艾湯斷艾

阿膠白芍藥人參橘皮甘草胎前加黃芩產

後入當歸 燒烟入管中熏狐惑蟲墮良

非時不正之氣傷人發爲頭痛壯熱因於寒

者用乾艾葉三升水一斗煮取一升頓服取

汗出肘後方 婦人良方治妊娠風寒卒中

不省人事狀如中風用熟艾三兩米醋和炒

極熱以絹包熨臍下良久即解 虻蟲咬或
 心痛如刺口吐清水白熟艾一升水三升煮
 取一升服吐蟲出或取生艾搗汁五更先食
 香脯一片乃飲一升當下蟲出 鶯掌風用
 蘄艾五兩水四五碗煮五六滾入大口瓶覆
 以麻布二層熏掌心如冷頓熱再熏如神
 發背初起急灸瘡頭不痛灸至痛痛灸至不
 痛奪命神方也縱潰毒氣外洩不致內攻矣

若未潰瘡頭用溼紙貼上看先乾處是也即
 於此灸 廉瘡年久口冷不合者用艾烟熏
 之

簡誤

艾性純陽善辟風寒溼氣及非時邪氣然性
 氣芳烈而燥熱凡婦人胎動不安由於熱而
 不由於寒妊娠下痢膿血由於暑溼腸胃熱
 甚而非單溼為病崩中由於血虛內熱經事

先期由於血熱吐血不由於鬼擊中惡霍亂
轉筋不由於寒邪而由於脾胃虛弱停滯或
傷暑所致不孕由於血虛而不由於風寒入
子宮法竝忌之

惡實味辛平主明目補中除風傷

疏○惡實至秋而成得天地清涼之氣本經
言辛平藏器兼苦升多於降陽也入手太陰
足陽明經為散風除熱解毒之要藥辛能散

結苦能洩熱熱結散則臟氣清明故明目而
補中風之所傷衛氣必壅壅則發熱辛涼解
散則表氣和風無所留矣故除風傷藏器主
風毒腫諸癩元素主潤肺散結氣利咽膈去
皮膚風通十二經者悉此意耳故用以治癩
癩痘瘡尤獲奇驗

上治參互

同赤檉木為癩家要藥 同浮萍等分為末

治風熱癰瘰薄荷湯下每服二錢日進二服
 同紫草犀角生地黃治天行痘瘡血熱乾
 枯不得出有神 痘瘡要訣治咽喉痘瘡牛
 旁子二錢桔梗一錢五分粉草節七分水煎
 服 和濟局方治痘瘡出不快時壯熱狂躁
 咽膈壅塞大便秘瀉小兒咽腫不利牛旁子
 炒一錢二分荆芥穗二分甘草四分水煎溫
 服已出亦可服名必勝散若大便利者勿用

延年方治風齧牙疼單用一味煎湯含漱
 吐去 袖珍方治便癰腫痛用牛旁子二錢
 炒研入蜜一匙朴消一匙空心溫酒服 劉
 禹錫傳信方療暴中風用緊細牛旁子根取
 時避風以竹刀或荆刀刮去土用生布拭了
 搗絞取汁一大升和蜜四大合溫分二服得
 汗出便瘥

簡誤

惡實性冷而滑利痘瘡家惟宜於血熱便閉
之證若氣虛色白大便自利或泄瀉者慎勿
服之痧癘不忌泄瀉故用之無妨癰疽已潰
非便閉不宜服

水萍味辛酸寒無毒主暴熱身癢下水氣勝酒
長鬚髮主消渴下氣以沐浴生毛髮久服輕身
一名水花

疏○水萍專得水氣之清陰故味辛氣寒別

錄兼酸無毒蓋其體輕浮其性清燥能祛溼
熱之藥也熱氣鬱於皮膚則作癢味辛而氣
清寒故能散皮膚之溼熱也寒能除熱燥能
除溼故下水氣酒性溼熱而萍之質不沉於
水其氣味辛寒輕清而散故能勝酒血熱則
鬚髮焦枯而易墮涼血則榮氣清而鬚髮自
長矣別錄主消渴者以溼熱之邪去則津液
自生而渴自止也其曰下氣以沐浴生毛髮

殷集
佳人用
生毛髮

者亦以寒能除熱涼血之驗也熱邪不干榮
氣清旺則能獲輕身矣

主治參互

蘇頌曰治惡疾癘瘡遍身者濃煮汁浴半日
多効 聖惠方少年面皰按浮萍禽之亦可
飲汁少許 千金翼方治小便不利膀胱水
氣流滯浮萍日乾爲末服方寸七日二服良
子母秘錄風熱丹毒浮萍搗汁傅之令遍

去風丹採浮萍詩曰天生靈草無根幹不

在山間不在岸始因飛絮逐東風汎梗青青
飄水面神仙一味去沉疴采時須在七月半
選甚癰風與大風些小微風都不筭豆淋酒
化服三九鐵撲頭上也出汗其法以紫背浮
萍曬乾爲細末煉蜜丸彈子大每服一丸以
豆淋酒化下治癰瘡三十六種風有驗

簡誤

癰瘡

趙長石

表氣虛而自汗者勿用

王瓜味苦寒無毒主消渴內疸瘀血月閉寒熱酸疼益氣愈聾療諸邪氣熱結鼠瘻散癰腫留血婦人帶下不通下乳汁止小便數不禁逐四肢骨節中水療馬骨刺人瘡

一名上瓜

疏○王瓜稟土中清肅陰寒之氣故味苦氣寒而無毒其能除溼熱熱毒大約與栝樓性同故其主治內疸消渴邪氣熱結鼠瘻癰腫

等證皆與栝樓相似而此則入血分諸病爲多耳簡誤主治與栝樓亦略相當不復贅

地榆味苦甘酸微寒無毒主婦人乳產痛七傷帶下五漏止痛除惡肉止汗療金瘡止膿血諸瘻惡瘡熱瘡消酒除消渴補絕傷產後內塞可作金瘡膏得髮良

慈麥門冬

疏○地榆稟地中陰氣而兼得乎天之微陽故味苦甘酸氣則微寒而無毒氣薄味厚沉

而降陰也入足厥陰少陰手足陽明經婦人
乳痃痛者厥陰肝經有熱以致血分熱壅所
致也七情傷於帶脉故帶下也五漏者陽明
大腸溼熱傷血病也血熱則腫而作痛惡肉
者亦血熱極則瘀故腫而成惡肉也傷則出
血血出必發熱而作痛金瘡是也膿血不止
皆血熱所致諸瘦惡瘡莫不由血熱所生苦
寒能涼血洩熱熱散則血活腫消故竝主如

上諸疾也性行而帶補味兼甘酸故補絕傷
及產後內塞也消酒除渴明日止純血痢疳
痢極効治腸風者皆善祛溼熱之功也沉寒
入下焦故多主下部溼熱諸病

主治參互

地榆得金銀花等分佐以芍藥甘草枳殼黃
連烏梅治血痢如熱在心經下利純鮮血則
加生犀角汁十五匙神驗 綿地榆四兩為

君加金銀花兩許鮫鯉甲三片土炒研細水
 酒煎濃空心溫熱服治橫痃魚口有神雖甚
 四服無不消者若已成膿更加鹽水炒黃耆
 五錢白芷二錢主速潰易合去鮫鯉甲并加
 牛膝木瓜殭蠶黃檗治下疳陰蝕極効 聖
 惠方治婦人漏下赤白不止令人黃瘦地榆
 三兩米醋一斤煮十餘沸去滓食前稍熱服
 一合 崔元亮海上方治赤痢骨立者地榆

一斤水三升煎一升半去滓再煎如稠餈絞
 濾空腹時服三合日再服 活法機要治久
 病腸風痛癢不止地榆五錢蒼朮 兩水二
 鍾煎一鍾空心服一日一服 肘後方治下
 血不止二十年者地榆鼠尾草各二兩水二
 升煮一升頓服若不斷以水漬屋塵飲一小
 盃投之 宣明方治結陰下血腹痛不已地
 榆四兩炙甘草三兩每服五錢水一盞入縮

砂七枚煎半盞分二服 肘後方治小兒疳
痢地榆煮汁熬如飴糖與服便已 千金方
治大指腫痛地榆煮汁漬之半日愈

簡誤

地榆性寒而下行凡脾胃虛寒作泄白痢久
而胃弱胎產虛寒泄瀉血崩脾虛作泄法竝
禁服

大小薊根味甘溫主養精保血大薊主女子赤

白沃安胎止吐血鼻衄令人肥健

疏○大薊根稟土之冲氣兼得天之陽氣故
味甘氣溫而無毒日華子凉當是微寒陶云
有毒誤也女子赤白沃血熱所致也胎因熱
則不安血熱妄行溢出上竅則吐衄大薊根
最能凉血血熱解則諸證自愈矣其性凉而
能行行而帶補補血凉血則榮氣和榮氣和
故令肥健也

主治參互

大薊葉得地榆茜草牛膝金銀花治腸癰腹
癰少腹癰生搗絞汁入前四味濃汁和童便
飲良 得炒蒲黃櫻皮灰調汁半升治崩中
下血立瘥 又治瘀血作暈跌撲損傷作痛
俱生取汁入酒并童便服 又治惡瘡疥癬
同鹽搗罾之 藥性論云大薊亦可單用味
苦平止崩中下血生取根搗絞汁服半升許

罾過
令切庵
入声
罾也

罾同
罾

立瘥 日華子云大薊葉涼治腸癰腹藏瘀
血血暈撲損可生研酒并小便任服惡瘡疥
癬鹽研罾傳又名刺薊山牛旁

○小薊根苗氣味甘溫微寒無毒其所稟與大
薊皆同得土中冲陽之氣而兼得乎春氣者
也故主養精保血精屬陰氣血之所生也甘
溫益血而除大熱故能養精而保血也 陳
藏器云破宿血生新血暴下血血崩出血嘔

血等絞取汁作煎和沙糖合金瘡及蜘蛛蛇
蝎毒服之亦佳 日華子云小薊根涼無毒
治熱毒風并胸膈煩悶開胃下食退熱補虛
損苗去煩熱生研汁服小薊力微只可退熱
不似大薊能補養下氣 食療云小薊根主
養氣取生根葉搗取自然汁服一盞亦佳又
取葉煮食之除風熱根主崩中又女子月候
傷過搗汁半升服之金瘡血不止按葉封之

夏月熱煩悶不止搗葉取汁半升服立瘥
聖惠方治心熱吐血口乾用刺薊葉及搗絞
取汁每服一小盞頓服 又方乳石發動壅
熱心悶吐血以生刺薊搗取汁每服三合入
蜜少許攪勻服之 外臺秘要治鼻塞不通
小薊一把水二升煮取一升去滓分服 梅
師方治卒吐血及瀉鮮血取小薊葉搗汁溫
服 簡要濟衆治九竅出血以刺薊一握絞

取汁以酒半盞調和頓服如無鮮汁只搗乾者為末冷水調三錢 又方治小兒浸淫瘡痛不可忍發寒熱刺薊末新水調傅瘡上乾即易之

簡誤

大小薊性下行以其能下氣故主崩衄多効惟不利於胃弱泄瀉及血虛極脾胃弱不思飲食之證

水腫

海藻味苦鹹寒無毒主瘰癧氣頸下核破散結氣癰腫癥瘕堅氣腹中上下鳴下十二水腫療皮間積聚暴潰癰氣熱結利小便

疏○海藻全稟海中陰氣以生故味苦鹹寒而無毒氣味俱厚純陰沉也苦能洩結寒能除血熱鹹能軟堅潤下故本經主瘰癧氣頸下核破散結氣癰腫癥瘕堅氣及腹中上下鳴下十二水腫療皮間積聚暴潰癰氣結熱

利小便潔古專消癭瘤馬刀瘰癧諸瘡堅而
不潰者經云鹹能軟堅滎氣不從外爲浮腫
隨各引經治之腫無不消反甘草一云有小
毒

主治參互

危氏得効方治蛇盤瘰癧頭項交接者海藻
柴以蕎麥麵炒過白殭蠶等分爲末以白梅
泡湯和丸梧子大每服六十九米飲下必泄

出毒氣宜加連翹 范汪方海藻酒治癭氣

及項下瘰癧用海藻一斤絹袋盛之以清酒
二斤浸之春夏二日秋冬三日每服兩合日
三酒盡再作其滓曝乾爲末每服方寸七日
三服不過兩劑卽瘥 雷公云凡使須用生
烏荳并紫背天葵同蒸一伏時曝乾用宜以
淡白酒先洗淨爲佳

簡誤

脾家有溼者勿服

澤蘭味苦甘微溫無毒主乳婦內衄中風餘疾

水腫

大腹水腫身面四肢浮腫骨節中水金瘡癰腫

防已為之使
根名地笋

瘡膿產後金瘡內塞
疏○澤蘭感土澤之氣故味苦甘而入血兼
得乎春氣故微溫而無毒桐君兼酸故入足
厥陰大陰經苦能洩熱甘能和血酸能入肝
溫通榮血故又主癰腫瘡膿及婦人吹乳乳

結止衄血并中風餘疾佐以益脾土之藥而
用防已為之使則主大腹水腫身面四肢浮
腫骨節中水氣日華子云澤蘭通九竅利關
脉養血氣破宿血消癥瘕產前產後百病通
小腸長肉生肌消撲損瘀血治鼻洪吐血頭
風目痛婦人勞瘦丈夫面黃又藥性論云澤
蘭使味苦辛主產後腹痛頻產血氣衰冷成
勞瘦羸又治通身面目人腫主婦人血瀝腰

痛總其洩熱和血行而帶補之能也

主治參互

澤蘭婦人方中最高為急用古人治婦人澤蘭丸甚多 澤蘭得炒黑豆炮乾薑當歸芍藥乾地黃牛膝益母草赤芍藥蒲黃五靈脂治產後惡露不盡少腹作痛俗名兒枕痛寒月加桂多火及內熱虛勞人去桂加童便去五靈脂加人參鼈甲香附麥門冬治產後諸虛

百病肺熱者去人參 雷公云凡使須要別識雌雄其形不同大澤蘭莖葉皆圓眼青黃能生血調氣養榮氣與小澤蘭迥別採得後看葉上斑根須尖此藥能破血通久積凡修事大小澤蘭須細剉之用絹袋盛懸於屋南畔角上令乾用 子母秘錄治小兒蓐瘡嚼澤蘭心封上澤蘭氣味和平除婦人產後他用甚稀故無簡誤

昆布味鹹寒無毒主十二種水腫癭瘤聚結氣瘰瘡

疏○昆布得水氣以生故味鹹氣寒而性無毒鹹能軟堅其性潤下寒能除熱散結故主十二種水腫癭瘤聚結氣瘰瘡東垣云癭堅如石者非此不除正鹹能軟堅之功也詳其氣味性能治療與海藻大略相同故同一簡誤也

主治參互

外臺秘要項下卒腫其囊漸大欲成癭者昆布海藻等分爲末蜜丸杏核大時時含嚥汁聖惠方癭氣結核癭癭腫硬以昆布一兩洗去鹹曬乾爲散每以一錢綿裏好醋浸過含之嚥汁味盡再易之項下五癭同此廣濟方治膀胱結氣急宜下氣用昆布一斤白米泔浸一宿洗去鹹味以水一斛煮熟劈細

入葱白一握寸斷之更煮極爛乃下鹽酢摻
薑橘椒末調和食之仍食梁米粳米飯極能
下氣

防已味辛苦平溫無毒主風寒溫瘧熱氣諸癰
除邪利大小便療水腫風腫去膀胱熱傷寒寒
熱邪氣中風手脚攣急止洩散癰腫惡結諸癰
疥癬蟲瘡通腠理利九竅

疏○防已得土中陽氣而兼感乎秋之燥氣

以生故味辛苦平溫無毒潔古謂其大苦
寒為得之然性燥而不淳善走下行長於除
溼以辛能走散兼之氣悍故主風寒溫瘧熱
氣諸癰除邪氣除溼下行故利大小便此本
經所載也別錄療水腫風腫去膀胱熱通腠
理利九竅止泄者皆除溼之功也其曰傷寒
寒熱邪氣中風手脚攣急則寒非燥藥可除
不宜輕試又曰散癰腫惡結諸癰疥癬蟲瘡

非在下部者亦不宜用治溼風口眼喎邪手足拘痛真由中風溼而病者方可用之留痰非由脾胃中溼熱而得者亦不宜服肺氣喘嗽不因風寒溼所鬱腠理壅滯者勿用惟治下焦溼熱腫洩脚氣行十二經溼為可任耳生漢中內有淡黑紋暈如車輻解者良凡修事以車前草根相對蒸半日曬乾殺雄黃毒惡細辛畏草薺女苑鹵鹹伏硝石殷孽為之

使

主治參互

凡用防已於下部溼熱藥中亦必以二朮茯苓黃檗甘草草薺木瓜石斛薏苡仁等補益之藥為主而使防已為使乃無瞑眩之患陶曰防已是療風水要藥潔古曰去下焦溼腫及痛并洩膀胱火邪必用漢防已龍膽草為君黃蘗知母甘草佐之防已乃是太陽本經

藥也 本草十劑云通可去滯通草防已之屬是也夫防已大苦寒能瀉血中溼熱通其滯塞亦能瀉大使補陰瀉陽助秋冬瀉春夏之藥也此之於人則險而健者也幸災樂禍能首為亂階然善用之亦可敵兇突險此瞑眩之藥也故聖人存而不廢大抵聞其臭則可惡下咽則令人心煩亂飲食減少至於一二經有溼壅塞不通及下

部氣壅滯腕

積熱非此藥不可真行經之仙藥無可代之者若夫飲食勞倦陰虛生內熱元氣穀食已虧以防已洩大便則重亡其血此不可用一也如人大渴引飲是熱在上焦肺經氣分宜滲泄而防已乃下焦血分藥此不可用二也外傷風寒邪搏肺經氣分溼熱而致小便黃赤乃至不通此上焦氣病禁用血藥此不可用三也大抵上焦溼熱者皆不可用下焦溼

熱流入十二經致二陰不通者然後審而用之
 張仲景方治皮水肘腫按之沒指不惡風水氣在皮膚中四肢聶聶動者防已茯苓湯主之防已黃耆桂枝各三兩茯苓六兩甘草三兩水一升煎半升日二服
 又方治風水惡風汗出身重脉浮防已黃耆湯主之防已一兩黃耆二兩二錢半白朮七錢半炙甘草半兩剉散每服五錢生薑四片棗一枚水

一盞半煎八分溫服良久再服腹痛加芍藥
 又治風溼相搏關節沉痛微腫惡風方同

上

簡誤

防已固為去下焦血分溼熱之要藥然其性悍其氣猛能走竄決防大苦大寒能傷胃氣凡胃虛陰虛自汗盜汗口苦舌乾腎虛小水不利及胎前產後血虛雖有下焦溼熱慎毋

用之犯之爲害非細

天麻味辛平無毒主諸風溼痺四肢拘攣小兒風癘驚氣利腰膝強筋力久服益氣輕身

疏○天麻得土之辛味兼感天之陽氣以生故其味辛氣平無毒大明云暖浮而升陽也入足厥陰經厥陰爲風木之臟諸風溼痺四肢拘攣小兒風癘驚氣皆肝臟爲邪氣所客致病天麻入肝味辛氣暖能逐風溼外邪則

肝氣平和前證自瘳矣肝主筋位居於下故能利腰膝強筋力也風溼纏注則身重氣乏能除風溼則身自輕氣自益也凡頭風眩暈與夫痰熱上壅以致頭痛及眩或四肢溼痺麻木小兒風癘驚悸等證所必須之藥

主治參互

同木半夏黃芩前胡橘皮茯苓治痰厥頭痛
同木橘皮茯苓車前治飲在心下作支滿

同南星前胡橘皮白前消一切風痰

簡誤

風藥多燥風能勝溼故也凡病人覺津液衰少口乾舌燥咽乾作痛大便閉澹病火炎頭暈血虛頭痛及南方似中風皆禁用之阿魏味辛平無毒主殺諸小蟲去臭氣破癥積下惡氣除邪鬼蠱毒

疏○阿魏稟火金之性而兼得乎天之陽氣

故其味辛平溫而無毒氣味俱厚陽也入足太陰陽明經其氣臭烈殊常故善殺諸蟲專辟惡氣辛則走而不守溫則通而能行故能消積利諸竅除穢惡邪鬼蠱毒也蘇恭曰體性極臭而能止臭亦奇物也

主治參互

同人參橘紅京三稜蓬莪茂砂仁治一切肉食堅積入膏藥同麝香硫黃蘇合油貼一切

本草

本草經疏卷九

綠君亭

痞塊 同安息香百部青黛丹砂治尸疰惡氣

簡誤

阿魏之氣臭烈人之血氣聞香則順聞臭則逆故凡脾胃虛弱之人雖有痞塊堅積不可輕用當先補養胃氣胃氣強則堅積可漸磨而消矣故古人治大積大聚消其大半而止此謂也

高良薑大溫主暴冷胃中冷逆霍亂腹痛

疏○高良薑稟地二之氣以生本經大溫薑器辛溫元素辛熱純陽浮也入足陽明太陰經二經為客寒所犯則逆冷霍亂腹痛諸病生焉辛溫煖脾胃而逐寒邪則胃中冷逆自除霍亂腹痛自愈矣甄權治腹內久冷氣痛去風冷痺弱大明主轉筋瀉痢反胃解酒毒消宿食蘇頌治惡心嘔清水皆取其煖胃溫

中散寒祛冷之功也

主治參互

外臺秘要霍亂吐利高良薑炙令香每用五兩以酒一升煮三四沸頓服亦治腹痛中惡
普濟方霍亂嘔甚不止用高良薑生剉二錢大棗一枚水煎冷服立定 永類鈴方心脾冷痛用高良薑三錢五靈脂六錢爲末每服三錢醋湯調下

簡誤

高良薑辛溫大熱惟治客寒犯胃胃冷嘔逆及傷生冷飲食致成霍亂吐瀉之要藥如胃火作嘔傷暑霍亂火熱注瀉心虛作痛法咸忌之

百部根微溫

蜀本云微寒

主欬嗽上氣

疏○百部根正得天地陰寒之氣故蜀本云微寒日華子言苦本經言微溫者誤也苦而

下洩故善降肺氣升則喘嗽故善治咳嗽上
氣能散肺熱故藥性論主潤益肺其性長於
殺蟲傳尸骨蒸勞往往有蟲故亦主之疳熱
有蟲及虻蟲寸白蟲蟻蟲皆能殺之又燒熏
樹木蛇蟲觸烟卽死亦殺蠅蠊日華子論之
詳矣陶云殺蟲濃煎洗牛馬蟲卽去陳藏器
云火炙酒浸空腹飲去蟲蠶咬兼疥癬瘡

主治參互

同桑根白皮天麥二冬貝母枇杷葉五味子
紫菀治一切虛嗽但不能治食積嗽 千金
方單用一味熬膏入蜜不時取服可療三十
年嗽 楊氏經驗方治遍身黃腫取鮮百部
根洗搗罨臍上以糯米飯半升拌酒半合揉
和蓋在藥上用帛包住過一二日後口內作
涎氣則水從小便出腫自消矣 聖濟總錄
百蟲入耳百部炒研細末生油調敷耳門上

簡誤

百部味苦脾虛胃弱人宜兼保脾安胃藥同
用庶不傷胃氣

藿香子味辛平無毒主諸瘦霍亂及蛇傷

疏○藿香得土金之冲氣而兼稟乎天之陽

故其味辛平亦應兼甘無毒辛香發散甘平

和胃入足太陰陽明太陽少陰經故主霍亂

香氣先入脾脾主肌肉故主諸瘦脾主四肢

故主脚氣通腎氣膀胱為腎之腑故主膀胱

腎間冷氣及治疝氣胃和則熱解熱解則口

臭自除

主治參互

藿香酒炒得川棟子荔枝核橘核肉桂蒼朮

木瓜牛膝治寒溼成疝 得炒砂仁食鹽則

主中惡腹痛霍亂腹痛吐逆 古方惡毒癰

腫或連陰髀間疼痛急攣牽入少腹不可忍

一宿則殺人者用藿香苗葉搗取汁一升服之日三四進用其滓以貼腫上冬間根亦可用此外國方永嘉已來用之起死神効

簡誤

藿香辛溫胃腎多火陽道數舉得熱則嘔者勿服

欬冬花味辛甘溫無毒主欬逆上氣善喘喉痺諸驚癇寒熱邪氣消渴喘息呼吸

疏○欬冬花得天地陰寒之氣而兼稟乎金水之性故凌冰雪而獨秀其味辛甘溫而無毒陰中含陽降也辛能散而能潤甘能緩而能和溫則通行不滯善能降下欬逆上氣善喘喉痺諸驚癇寒熱邪氣消渴喘息呼吸一皆氣升火炎之病也氣降則火自降氣降則陽交於陰水火既濟既濟則火不上炎氣不逆升肺不受邪得清肅之常道而諸證自退

矣杏仁為之使得紫苑良

主治參互

款冬花雖畏貝母然得貝母桑根白皮紫苑
枇杷葉栝樓根百部天麥門冬杏仁治喘逆
及咳嗽反良物有相制故也如半夏畏生薑
得之則制其毒而愈能奏効也 得麻黃杏
仁桑根白皮甘草治風寒鬱實熱於上焦肺
分作喘其効甚速 一味燒烟吸之治喘嗽

紅花

具如本草註中所載 濟生方痰嗽帶血款
冬花百合蒸焙等分為末蜜丸龍眼大每臥
時嚼一丸薄荷湯下 款冬花古今方用之
為治嗽要藥以其辛溫散而能降於肺無迂
無分寒熱虛實皆可施用故無簡誤

紅藍花味辛溫無毒主產後血暈口噤腹內惡
血不盡絞痛胎死腹中竝酒煮服亦主蠱毒下
血堪作燕脂其苗生搗碎傅遊腫其子吞數顆

主天行瘡子不出其燕脂主小兒聾耳滴耳中
 疏○紅藍花稟土與火之氣潔古海藏皆兼
 甘苦溫陰中之陽故入心海藏以為肝經血
 分藥也。入酒良。乃行血之要藥。其主產後血
 暈口噤者緣惡血不下逆上衝心故神昏而
 暈及口噤入心入肝使惡血下行則暈與口
 噤自止。腹內絞痛。由於惡血不盡。胎死腹中
 非行血活血則不下。瘀行則血活故能止絞
 痛。下死胎也。凡蠱藥之毒必傷血分此藥能
 行血血活則毒可解子主天行瘡子者痘瘡
 因血分有毒血行則毒散故主之也小兒聾
 耳亦血凝也血散則耳腫自消矣

主治參互

熱病胎死腹中新汲水濃煮紅藍花汁和童
 使熱飲之立瘥。胞衣不下產後血暈竝同此
 法無不立効。同延胡索當歸生地黃牛膝

赤芍藥益母草川芎或丸或煎治經阻少腹
 作痛及結塊良 其子主天行痘瘡血熱有
 功宜同生犀角紫草生地黃用 燕脂其汁
 所造也痘瘡初發時以之抹眼眶及眼角可
 免瘡子入眼 同薄荷金絲荷葉汁入礬末
 少許滴入耳中治聾耳 同水片真珠細末
 治痘毒及痘疔剔破令人吮出惡血抹入瘡
 眼中良

簡誤

紅藍花本行血藥也血暈解留滯行即止過
 用能使血行不止而斃世人所不知者

牡丹味辛苦寒微寒無毒主寒熱中風痲痺瘰
 驚癇邪氣除癥堅瘀血留舍腸胃安五藏療癰
 瘡除時氣頭痛客熱五勞勞氣頭腰痛風噤癩
 疾

疏○牡丹皮稟季春之氣而兼得乎木之性

陰中微陽其味苦而微辛其氣寒而無毒其色赤而象火故入手少陰厥陰足厥陰亦入足少陰經辛以散結聚苦寒除血熱入血分涼血熱之要藥也寒熱者陰虛血熱之候也中風痲痺痙驚癇皆坐陰虛內熱榮血不足之故熱去則血涼涼則新血生陰氣復陰氣復則火不炎而無因熱生風之證矣故悉主癰瘡者熱壅血瘀而成也涼血行血故療

癰瘡辛能行血苦能泄熱故能除血分邪氣及癥堅瘀血留舍腸胃臟屬陰而藏精喜清而惡熱熱除則五臟自安矣別錄并主時氣頭痛客熱五勞勞氣頭腰痛者泄熱涼血之功也甄權又主經脈不通血瀝腰痛此皆血因熱而枯之候也血中伏火非此不除故治骨蒸無汗及小兒天行痘瘡血熱東垣謂心虛腸胃積熱心火熾甚心氣不足者以牡丹

皮為君亦此意也忌胡荽赤花者利白花者補

主治參互

神不足者手少陰志不足者足少陰故仲景腎氣丸用之治神志之不足究竟牡丹皮乃入心經正藥心主血涼血則心不熱而陰氣得寧用之腎經藥中者陰陽之精互藏其宅神志水火藏於心腎即身中坎離也交則陰

陽和而百病不生不交則陰陽否而精神離矣欲求弗夭其可得乎 入清胃散治陽明胃經血熱齒痛 潔古曰葉為陽發生也花為陰成實也丹者赤色火也故能瀉陰胞中之火四物湯加之治婦人骨蒸又曰牡丹皮入手厥陰足少陰故治無汗之骨蒸然須與青蒿子天麥門冬沙參地黃五味子牛膝枸杞之屬同用始得其力

簡誤

牡丹皮本入血涼血之藥然能行血凡婦人血崩及經行過期不淨竝忌與行血藥同用京三稜味苦平無毒主老癖癥瘕結塊俗傳昔人患癥癖死遺言令開腹取之得病塊堅硬如石文理有五色人謂異物竊取削成刀柄後因以刀刈三稜柄消成水乃知此可療癥癖也黃色體重狀若鯽魚而小者良

疏○京三稜稟火土之氣故本經味苦平澀古兼甘亦應兼辛兼甘故無毒入足厥陰亦入足太陰從血藥則治血從氣藥則治氣老癖癥瘕積聚結塊未有不由血瘀氣結食停所致苦能泄而辛能散甘能和而入脾血屬陰而有形此所以能治一切凝結停滯有形之堅積也又主產後惡血血結通月水墮胎止痛利氣者亦散血行氣之功用也潔古用

以治心膈痛飲食不消海藏用以通肝經積血皆與作者之意合也

主治參互

同蓬莪茂青皮香附延胡索肉桂牡蠣鼈甲
人參則消一切堅癥老癖之積聚 同青皮
紅藍花當歸川芎生地黃芍藥桂心牛膝延
胡索五靈脂則治產後一切惡血停滯留結
及月水凝蓄不通少腹作痛不可按 同橘

皮青皮縮砂蜜紅麴山查麥芽人參肉苳蔻
黃連則消一切食積并氣壅塞不利 子母
秘錄治小兒氣癖三稜煮汁作羹粥與奶母
食日亦以棗許與兒食小兒百日及十歲已
下癩熱疰癖皆理之合人參彌良

簡誤

京三稜潔古謂其辛苦甘無毒陰中之陽能
瀉真氣真氣虛者勿用此見諦之言也故凡

用以消導必資人參芍藥地黃之力而後可
以無弊觀東垣五積方皆有人參意可知已
何者蓋積聚癥癖必由元氣不足不能運化
流行致之欲其消也必藉脾胃氣旺能漸漸
消磨開散以收平復之功如祇一味專用克
削則脾胃之氣愈弱後天之氣益虧將見故
者不去新者復至矣戒之哉

薑黃味辛苦大寒無毒主心腹結積疰忤下氣
破血除風熱消癰腫功力烈於鬱金

疏○薑黃得火氣多金氣少故其味苦勝辛
劣辛香燥烈性不應寒宜其無毒陽中陰也
降也入足太陰亦入足厥陰經若能泄熱辛
能散結故主心腹結積之屬血分者兼能治
氣故又云下氣總其辛苦之力破血除風熱
消癰腫其能事也日華子謂其能治癥瘕血
塊又通月經及撲損瘀血蘇頌謂其祛邪辟

惡治氣脹及產後敗血攻心方書用以同肉桂枳殼治右脇痛臂痛有效戴元禮云能入手臂治痛何莫非下氣破血辛走苦洩之功歟察其氣味治療乃介乎京三稜鬱金之藥也

主治參互

得當歸生地黃牛膝延胡索肉桂治一切積血在腹中作痛 經驗方治中寒心痛難忍

薑黃一兩桂三兩為末醋湯服一錢 產寶方治產後血痛有塊用薑黃桂心等分為末酒服方寸匕血下盡即愈

簡誤

凡病人因血虛臂痛血虛腹痛而非瘀血凝滯氣逆上壅作脹者切勿誤用誤則愈傷血分令病轉劇慎之慎之

青黛味鹹寒無毒主解諸藥毒小兒諸熱驚癇

解諸藥毒

發熱天行頭痛寒熱並水研服之亦摩傳熱瘡
惡腫金瘡下血蛇犬等毒染澱亦堪傳熱毒惡
腫蛇虺螫毒

疏○青黛外國藍靛之英華也稟水土陰寒
之氣以生故味鹹寒而無毒甄權謂其甘平
以其得土氣之厚也故可解諸藥毒及小兒
諸熱驚癇發熱天行頭痛寒熱並水研服之
亦磨傳熱瘡惡腫金瘡下血蛇犬等毒波斯
國來及太原產者勝如不可得即用染甕上
沫之紫碧色者亦可

主治參互

得蕪美使君子肉胡黃連蘆會殺蟲除熱及
小兒一切疳積病 醫學正傳治心口熱痛
薑汁調一錢服之 聖惠方治內熱吐血青
黛二錢新汲水下 中藏經治肺熱咯血用
青黛一兩杏仁以牡蠣粉炒過一兩研勻黃

秘書用
青黛

蠟化和作三十餅子方名青餅子每服一餅以乾柿半箇夾定溼紙裏煨香嚼食粥飲送下日三服 生生編治小兒夜啼青黛水研服之 宮氣方治小兒疳痢歌云孩兒雜病變成疳不問強羸女與男煩熱毛焦鼻口燥皮膚枯槁四肢癱腹中時時更下痢青黃赤白一般般眼澀面黃鼻孔赤穀道開張不可看此方便是青黛散孩兒百病服之安 活

人書治傷寒赤斑青黛二錢水研服

簡誤

青黛既稟陰寒之氣而生解毒除熱固其所長古方多有用之於諸血證者使非血分實熱而病生於陰虛內熱陽無所附火氣因空上炎發爲吐衄咯唾等證用之非宜血得寒則凝凝則寒熱交作胸膈或痛愈增其病矣醫師宜詳辨之

鬱金味辛苦寒無毒主血積下氣生肌止血破惡血血淋尿血金瘡

疏○鬱金稟天令清涼之氣而兼得土中金火之味故其味辛苦其氣寒而無毒潔古論氣味俱薄陰也降也入酒亦能升入手少陰足厥陰兼通足陽明經辛能散苦能洩故善降逆氣入心肝胃三經故治血積氣降而和則血凝者散故主生肌止血其破惡血治血

淋尿血主金瘡者調氣行血之功也單用亦治女人宿血氣心痛冷氣結聚溫醋磨服之入心涼血故潔古用以涼心入足陽明故治陽毒入胃下血頻痛其性輕揚能開鬱滯故爲調逆氣行瘀血之要藥

主治參互

鬱金同韭菜番降香當歸生地黃童便能治怒氣傷肝吐血又治鼻衄唾血喉中血腥氣

及經脉逆行有痰方加竹瀝 鬱金七兩同
明礬三兩爲細末薄米糊爲丸梧子大每服
五十九白湯下昔人曾治婦人癲狂十年不
愈初服此藥心胸間有物脫去卽神氣洒然
再服而蘇此驚憂痰血總聚心竅所致此藥
入心去惡血明礬化頑痰故也 龐安常傷

寒論云痘疹始有白泡忽搐入腹漸作紫黑
色無膿日夜叫亂者鬱金一枚甘草二錢半

水半碗煮乾去甘草切片微 烘燥爲末入
真片腦半錢每用一錢以生猪尾血五七滴
新汲水調下不過二服甚者毒氣從手足心
出如癰狀乃瘥此乃五死一生之候也 又
范石湖文集云嶺南有采生之害其術於飲
食中行厭勝法致魚肉能反生於人腹中而
人已死則陰役其家初得覺胸腹痛次日刺
人十日則生在腹中也凡胸膈痛卽用升麻

或膽礬吐之若膈下痛急以米湯調鬱金末
二錢服卽瀉出惡物或合升麻鬱金服之不
吐則下李巽巖侍郎爲雷州推官鞠獄得此
方活人甚多

簡誤

鬱金本入血分之氣藥其治已上諸血證者
正謂血之上行皆屬於內熱火炎此藥能降
氣氣降卽是火降而其性又入血分故能降
下火氣則血不妄行丹溪不達此理乃謂其
上行治血則誤矣凡病屬真陰虛極陰分火
炎薄血妄行溢出上竅而非氣分拂逆肝氣
不平以致傷肝吐血者不宜用也卽用之亦
無効

盧會味苦寒無毒主熱風煩悶胸膈間熱氣明
目鎮心小兒癩癩驚風瘰癧五疳殺三蟲及痔病
瘡癩解巴豆毒俗呼爲象膽蓋以其味苦如膽

故也生波斯國似黑錫

疏○盧會稟天地陰寒之氣故其味苦其氣
寒其性無毒寒能除熱苦能泄熱燥溼苦能
殺蟲至苦至寒故爲除熱殺蟲之要藥其主
熱風煩悶胸脇間熱氣明日鎮心小兒癩癩
驚風療五疳殺三蟲者熱則生風熱能使人
煩悶熱除則風熱煩悶及胸脇間熱氣自解
涼肝故明日除煩故鎮心小兒癩癩驚風熱
所化也五疳同爲內熱脾胃停滯之證三蟲
生於腸胃溼熱痔病瘡癩亦皆溼熱下客腸
臟致血凝滯之所生故悉主之能解巴豆毒
亦除熱之力也詳其功用是足厥陰足太陰
二經藥亦可兼入手少陰經

主治參互

同厚朴橘紅甘草青黛蕪荑百草霜旋復花
爲末以砂仁湯吞治小兒諸疳一歲一分甚

効 衛生易簡方治脾疳與使君子等分爲末每服一二錢米飲調下 李恂用以主小兒諸疳熱 甄權單用殺疳虵及吹鼻殺腦疳除鼻癢 蘇頌研末傅鬢齒甚効治溼癬出黃水有神 治大便不通真蘆會研細七錢朱砂研如飛麴五錢滴好酒和丸每服三錢酒吞朝服暮服朝通須天晴時修合爲妙

簡誤

其味至苦其性大寒主消不主補凡兒脾胃虛寒作瀉及不思食者禁用

延胡索味辛溫無毒主破血產後諸病因血所爲者婦人月經不調腹中結塊崩中淋露產後血暈暴血衝上因損下血或酒摩及煮服

疏○延胡索稟初夏之氣而兼得乎金之辛味故味辛氣溫而無毒入足厥陰亦入手少

陰經溫則能和暢和暢則氣行辛則能潤而走散走散則血活血活氣行故能主破血及產後諸病因血所爲者婦人月經之所以不調者無他氣血不和因而凝滯則不能以時至而多後期之證也腹中結塊產後血暈暴血衝上因損下血等證皆須氣血和而後愈故悉主之也崩中淋漓利守不利走此則非與補氣血藥同用未見其可

主治參互

君當歸生地黃牛膝益母草童便則主產後血暈有神 得四物湯白膠牛膝香附則主婦人經阻少腹作痛或結塊 活人書治小便尿血用延胡索一兩朴硝七錢半爲末每服四錢水煎服非蓄血瘀滯者不可用 勝金方治膜外氣疼及氣塊延胡索不限多少 爲末猪胰一具切作塊子炙熟蘸末頻食之

聖惠方治熱厥心痛或發或止久不愈身
 熱足寒者用延胡索去皮金鈴子肉等分爲
 末每溫酒或白滾湯下二錢 濟生方治婦
 女血氣腹中刺痛經候不調用延胡索去皮
 醋炒當歸酒浸炒各一兩橘紅二兩爲末酒
 煮米糊丸梧子大每服一百丸空心艾醋湯
 下 聖惠方治產後諸病凡產後穢汚不盡
 腹滿及產後血暈心頭硬或寒熱不禁或心

悶手足煩熱氣力欲絕諸病竝用延胡索炒
 研酒服二錢 直指方治疝氣危急用延胡
 索鹽水炒全蝎去毒生用等分爲末空心鹽
 酒下 又方治冷氣腰痛用延胡索當歸桂
 心等分爲末溫酒服三四錢隨量頻進以止
 爲度 聖惠方治墜落車馬筋骨痛不止延
 胡索末豆淋酒服二錢日二服

簡誤

此藥性溫味辛能走而不能守故經事先期及一切血熱爲病凡崩中淋露皆應補氣血涼血清熱則愈一切辛走之藥法所應禁肉荳蔻味辛溫無毒主鬼氣溫中治積冷心腹脹痛霍亂中惡冷症嘔沫冷氣消食止洩小兒乳霍糯米粉裹煨去粉搗碎忌銅鐵器

疏○肉荳蔻稟火土金之氣故味辛氣溫而無毒入足太陰陽明經亦入手陽明大腸辛味能散能消溫氣能和中通暢其氣芬芳香氣先入脾胃主消化溫和而辛香故開胃胃喜煖故也故爲理脾開胃消宿食止洩瀉之要藥香能辟惡除不祥又中氣不虛則邪惡之氣不能入故主鬼氣及溫中脾主中焦胃爲後天生氣之本脾胃之陽氣旺則積冷心腹脹滿霍亂中惡冷症嘔沫冷氣食不消洩不止小兒乳霍諸證自除矣

主治參互

君人參補骨脂吳茱萸五味子砂仁為治腎
 泄及冷泄之聖藥 得縮砂蜜橘皮人參紅
 麴山查肉霍香麥芽為開胃進飲食消宿食
 止瀉之上劑 獨用修事為末以棗肉和丸
 或為末縮砂湯下名公子登筵散言服之即
 可赴席其開胃進食消導之功烈矣
 選方治久瀉不止用肉苳蔻一兩木香二錢

五分為末棗肉和丸米飲下四五十九又方
 肉苳蔻煨一兩熟附子七錢為末糊丸米飲
 服四五十九 瑞竹堂方治老人虛瀉肉苳
 蔻三錢煨研乳香一兩為末 全幼心鑑治
 小兒泄瀉用肉苳蔻五錢乳香二錢半生薑
 五片同炒黑色去薑研為膏收入密器旋丸
 菜豆大每量大小米飲下 聖惠方治冷痢
 腹痛不能食者肉苳蔻一兩去皮醋和麵裹

煨搗末每服一錢粥飲調下

簡誤

大腸素有火熱及中暑熱泄暴注腸風下血
胃火齒痛及溼熱積滯方盛滯下初起皆不
宜服

補骨脂味辛大溫無毒主五勞七傷風虛冷骨
髓傷敗腎冷精流及婦人血氣墮胎一名破故

紙思羊肉皆而
得胡桃良

疏○補骨脂稟火土之氣而兼得乎天令之
陽故其味辛其氣大溫性則無毒陽中微陰
降多升少入手厥陰心包絡命門足太陰脾
經能煖水臟陰中生陽壯火益土之要藥也
其主五勞七傷蓋緣勞傷之病多起於脾腎
兩虛以其能煖水臟補火以生土則腎中真
陽之氣得補而上升則能腐熟水穀蒸糟粕
而化精微脾氣散精上歸於肺以榮養乎五

臟故主五臟之勞七情之傷所生病風虛冷者因陽氣衰敗則風冷乘虛而客之以致骨髓傷敗腎冷精流腎主骨而藏精髓乃精之本真陽之氣不固卽前證見矣固其本而陽氣生則前證自除男子以精爲主婦人以血爲主婦人血氣者亦猶男子陽衰腎冷而爲血脫氣陷之病同乎男子之腎冷精流也大溫而辛火能消物故能墮胎

主治參互

三因方治精氣不固用破故紙青鹽等分同炒爲末每服二錢米飲下 普濟方治小便無度腎氣虛寒用破故紙十兩酒蒸茴香十兩鹽炒爲末酒糊丸梧子大每服百丸鹽酒下或以末糝猪腎煨食之 嬰童百問治小兒遺尿膀胱冷也夜屬陰故小便不禁用破故紙炒爲末每夜熱湯服五分 和劑方補

骨脂丸治下元虛敗脚手沉重夜多盜汗縱
 慾所致此藥壯筋骨益元氣補骨脂四兩炒
 香菟絲子四兩酒蒸胡桃肉一兩去皮沉香
 研細一錢半煉蜜丸如梧子大每服二三十
 丸空心鹽湯溫酒任下自夏至起冬至止日
 一服此乃唐宣宗時張壽太尉知廣州得方
 於南番人有詩云三年時節向邊隅人信方
 知藥力殊奪得春光來在手青蛾休笑白髭

腰痛

鬚 經驗方治虛勞男子女人五勞七傷下
 元虛冷一切風病四肢疼痛駐顏壯氣烏髭
 鬚用補骨脂一斤酒浸一宿曬乾却用烏油
 麻一升和炒令麻子聲絕簸去只用補骨脂
 爲末醋煮麵糊丸如梧子大每服二三十丸
 空心溫酒鹽湯任下 又方治腎虛腰痛用
 破故紙一兩炒爲末溫酒服三錢神効或加
 木香一錢 和劑局方青娥丸治腎氣虛弱

風冷乘之或血氣相搏腰痛如折俛仰不利
 或因勞役或濕滯不散皆令腰痛或腰間如
 風寒客搏或濕滯不散皆令腰痛或腰間如
 物重墜用破故紙酒浸炒一斤杜仲去皮切
 片薑汁炒一斤胡桃肉去皮二十箇為末以
 蒜搗膏一兩和九梧子大每空心溫酒服二
 十九婦人淡醋湯下常服壯筋骨活血脉烏
 髭鬚益顏色 夏子益奇疾方治玉莖不痿

精滑無歇時時如針刺捏之則脆此名腎漏
 用破故紙韭子各一兩為末每用三錢水二
 盞煎六分服日三次愈則止 二神丸治脾
 腎虛瀉用破故紙炒半斤肉荳蔻生用四兩
 為末肥棗研膏和九梧子大每服五七十九
 空心米飲下本事方加木香二兩名三神丸
 直指方治打墜腰痛瘀血凝滯用破故紙
 炒茴香炒辣桂等分為末每熱酒服二錢

唐鄭相國自敘云予爲南海節度年七十五
粵地卑溼傷於內外衆疾俱作陽氣衰絕服
乳石補藥百端不應元和七年有訶陵國舶
主李摩訶知予病狀遂傳此方并藥予初疑
而未服摩訶稽首固請遂服之經七八日而
覺應驗自爾常服其功神効十年二月罷郡
歸京錄方傳之用破故紙十兩淨去皮洗過
曝乾酒浸蒸再曝搗篩令細胡桃瓢二十兩
湯浸去皮細研如泥更以好蜜和令如飴糖
瓷器盛之旦日以煖酒二合調藥十匙服之
便以飯壓如不飲酒人以煖熟水調之餌久
則延年益氣悅心明目補添筋骨但禁芸臺
羊肉餘無所忌此物本自外番隨海舶而來
非中華所有番人呼爲補骨脂語訛傳爲破
故紙也王紹顏續傳信方載其事頗詳故錄
之按白飛霞方外奇方云破故紙屬火收

歛神明能使心包之火與命門之火相通故
元陽堅固骨髓充實瀦以治脫也胡桃屬木
潤燥養血血屬陰惡燥故油以潤之佐破故
紙有木火相生之妙故語云破故紙無胡桃
猶水母之無蝦也

簡誤

補骨脂陽藥也凡病陰虛火動陽道妄舉夢
遺尿血小便短瀦及目赤口苦舌乾大便燥
結內熱作渴火升目赤易饑嘈雜溼熱成痿
以致骨乏無力者皆不宜服

縮砂蜜味辛溫無毒主虛冷瀉宿食不消赤
白泄痢腹中虛痛下氣

疏○縮砂蜜稟天地陽和之氣以生故其味
辛其氣溫其性無毒入足太陰陽明少陰厥
陰亦入手太陰陽明厥陰可升可降降多於
升陽也辛能散又能潤溫能和暢通達虛勞

冷瀉脾腎不足也宿食不消脾胃俱虛也赤白滯下胃與大腸因虛而溼熱與積滯客之所成也辛以潤腎故使氣下行兼溫則脾腎之氣皆和和則冷瀉自止宿食自消赤白滯下自愈氣下則氣得歸元故腹中虛痛自已也甄權用以止冷氣痛止休息痢消化水穀溫煖肝腎陳藏器用以主上氣奔豚鬼疰邪氣鬼疰必由於脾腎兩虛陰陽乏絕故也日

華子用以主一切氣轉筋霍亂轉筋霍亂必由脾胃爲邪所干胃氣壅滯閉塞而成楊氏用以止痛安胎氣結則作痛氣逆則胎不安潔古用以治脾胃氣結滯不散皆下氣散結溫中和胃入脾入腎入肝入命門入大腸之故耳

主治參互

縮砂蜜氣味辛溫而芬芳香氣入脾辛能潤

腎故為開脾胃之要藥和中氣之正品若兼
 腎虛氣不歸元非此為向導不濟殆勝桂附
 熱毒之害多矣好古謂得人參益智則入脾
 得黃檗茯苓則入腎得赤白石脂則入大小
 腸也 得人參橘皮藿香白茯苓白芍藥炙
 甘草治泄瀉兼嘔吐及不思食 得藿香橘
 皮木瓜治霍亂轉筋腹痛吐瀉 獨用兩許
 炒為末入食鹽三錢滾湯一碗泡浸冷服治

乾霍亂累効 藥性論治冷滑下痢不禁虛

羸以縮砂仁為末以羊子肝薄切糝之瓦上
 焙乾為末入乾薑末等分飯丸梧子大每四
 十丸白湯下日二服 直指方治遍身腫滿
 陰亦腫者用縮砂仁土狗一箇等分研和老
 酒服之 簡便方治痰氣膈脹用砂仁搗碎
 以蘿蔔汁浸透焙乾為末每服二錢食遠沸
 湯服 簡便方治上氣欬逆用砂仁洗淨炒

研生薑連皮等分搗爛熱酒食遠泡服 溫
 隱居方治子癇昏冒用砂仁和皮炒黑熱酒
 調下二錢不飲者米飲下此方安胎止痛其
 効不可盡述 孫尚藥方治妊娠胎動偶因
 所觸或跌墮傷損致胎不安痛不可忍者用
 砂仁熨斗炒熱去皮用仁搗碎每服二錢熱
 酒調下須臾覺腹中胎動極熱即胎已安矣
 神効 婦人良方治婦人血崩用砂仁於新
 瓦上焙研末米飲服三錢 直指方治牙齒
 疼痛縮砂仁常嚼之良 事林廣記治一切
 食毒用砂仁末水服二錢

簡誤

縮砂蜜氣味辛溫陽藥也凡腹痛屬火泄瀉
 得之暑熱胎動由於血熱咽痛由於火炎小
 兒脫肛由於氣虛腫滿由於溼熱上氣欬逆
 由於火衝迫肺而不由於寒氣所傷皆須詳

察簡別難以槩用誤則有損無益勿易視也
本非肺經藥今亦有用之於欬逆者通指寒
邪鬱肺氣不得舒以致欬逆之證若咳嗽多
緣肺熱此藥卽不應用矣

蓬莪茂味苦辛溫無毒主心腹痛中惡疰忤鬼
氣霍亂冷氣吐酸水解毒食飲不消酒磨服之
又療婦人血氣丈夫奔狔

疏○蓬莪茂感夏末秋初之氣而得土金之
味故其味苦辛其氣溫而無毒陽中陰降也
入足厥陰肝經氣分能破氣中之血入氣藥
發諸香主積聚諸氣爲最要之藥與京三稜
同用之良心腹痛者非血氣不得調和卽是
邪客中焦所致中惡疰忤鬼氣皆由氣不調
和臟腑壅滯陰陽乖隔則疫癘疰忤鬼氣得
以憑之茂氣香烈能調氣通竅竅利則邪無
所容而散矣解毒之義亦同乎是其主霍亂

冷氣吐酸水及飲食不消皆行氣之功也故多用酒磨又療婦人血氣結積丈夫奔狫入肝破血行氣故也多用醋磨鬱金入心亦入肝專主血分亦散肝鬱茂與三稜專能行氣破積薑黃行氣破血入脾為多

主治參互

得人參橘皮縮砂蜜京三稜肉荳蔻青皮麥蘖穀蘖木香消一切飲食停滯積聚及小兒

癥癖甚良

楊子建護命方治一切冷氣於

心切痛發即欲死久患心腹痛時發者蓬莪茂醋煮二兩木香煨一兩為末淡醋湯下半錢 普濟方治婦人血氣遊走作痛及腰痛茂同乾漆等分為末酒服二錢腰痛核桃酒下 保幼大全治小兒盤腸內釣痛以茂半兩用阿魏一錢化水浸週時焙研紫蘇湯下一字 十全普救方治小兒氣痛以茂炮熟

為末熱酒服一錢 保幼大全治初生吐乳
不止用茂少許鹽二釐乳一合煎三五沸去
滓入牛黃二釐服之甚効 危氏得効方治
渾身燎炮每箇出水有靨一片如指甲大其
泡復生抽盡肌肉即不可治用茂同三稜各
五錢為末分三服酒調連進愈

簡誤

蓬莪茂行氣破血散結是其功能之所長若

夫婦人小兒氣血兩虛脾胃素弱而無積滯
者用之反能損真氣使食愈不消而脾胃益
弱即有血氣凝結飲食積滯亦當與健脾開
胃補益元氣藥同用乃無損耳

白前味甘微溫 蜀本云微寒 無毒主胸脇逆氣咳嗽

上氣

疏○白前感秋之氣而得土之冲味故味甘
辛氣微溫蘇恭又謂微寒性無毒陽中之陰

降也入手太陰肺家之要藥甘能緩辛能散
溫能下以其長於下氣故主胸脇逆氣咳嗽
上氣二病皆氣升氣逆痰隨氣壅所致氣降
則痰自降能降氣則病本立拔矣微溫微寒
見人參條下

主治參互

寇宗奭曰白前能保定肺氣治嗽多用以溫
藥相佐使尤佳 仲景金匱要略治嗽而脉

浮用澤漆湯中有白前苗似細辛而大根色
白亦似白微又似牛膝脆而易折不若白微
之可彎而不折也苦者非是 外臺方治久
嗽吐血用白前桔梗桑根白皮各三兩甘草
炙一兩水六升煮一升分三服忌猪肉菘菜
深師方治久欬上氣體腫短氣晝夜倚壁
不得臥常作水雞聲者白前湯主之白前二
兩紫苑半夏各三兩大戟七合以水一斗漬

一宿煮取三升分作數十服第進一服勿相繼以須藥力之行

簡誤

白前辛溫走散下氣之藥性無補益凡欬逆上氣欬嗽氣逆由於氣虛氣不歸元而不由於肺氣因邪客壅實者禁用深師方中所主久欬上氣體腫短氣脹滿當是有停飲水溼溼痰之病乃可用之病不由於此者不得輕

施

曰藥味辛溫無毒主金瘡生肌

疏○白藥稟天地清寒之氣而兼金水之性故味辛經云氣溫日華子云冷當是辛寒之藥無疑故無毒而能解毒金瘡出血過多必發熱熱則作痛不得生肌矣涼血清熱則其痛自止肌自生也又藥性論亦可單用味苦能治喉中熱塞噎痺不通胸中隘塞咽中常

痛腫脹日華子云性冷消痰止嗽治濕并吐血喉閉消腫毒又云剪草根名白藥詳味二條所主皆解熱散結之功則其爲寒明矣入肺入胃不言可知

主治參互

施州人取白藥子并野猪尾二味洗淨去粗皮焙乾等分爲末酒調服二錢許療心氣痛解熱毒甚効 又諸瘡癰腫不散者取生根

爛擣傅貼乾則易之無生者用細末水調塗之亦可 崔元亮海上方治一切天行熱病取白藥研如麵二錢漿水一大盞空腹頓服之便仰臥一食頃候心頭悶亂或惡心腹內如車鳴疴刺痛良久當有吐利數行勿怪欲服藥時先令煮漿水粥於井中懸着待冷若吐利過度卽喫冷粥一碗止之不喫卽困人經驗方治妊娠傷寒護胎以白藥子爲細

末雞子清調攤於綿紙上可如碗大自臍貼至臍下胎存生處乾即以溼水潤之 衍義

又為治馬肺熱藥有效 聖惠方治風熱上

壅咽喉不利白藥三兩黑牽牛五錢同炒香

去牽牛一半為末防風末三兩和勻每一錢

水調服 又方治吐血不止白藥煨存性糯

米飲服三錢 又方治咽喉腫痛白藥末一

兩龍腦香二分五釐生蜜和九芡實大每含

燕一丸 又方名鐵罩散治胎熱不安用白

藥子一兩白芷五錢為末每服二錢紫蘇湯

下心煩熱入白砂糖少許 經驗良方治衄

血不止紅棗肉白藥各煨存性等分為末糯

米飲調服二錢許

簡誤

苦寒辛散之物凡病雖有血熱吐衄等證若

脾胃素弱易於作泄者勿服

莎草根味甘微寒無毒主除胸中熱充皮毛久服令人益氣長鬚眉

疏○莎草根稟天地溫燥之氣而兼得乎土金之味故其味甘應有苦辛微寒亦應微溫無毒入足厥陰氣分亦入手太陰經氣厚於味陽中之陰降也血中之氣藥也能行十二經入脉氣分得童子小便苦酒漬過良芎藭爲之使辛主散苦溫主降泄肝主怒而苦急

肺苦氣上逆而主皮毛怒則氣上逆逆則胸中熱降則肝氣平而胸中熱除肺得安而皮毛自充鬚眉自長矣其云久服益氣者是亦調氣之功也蘇頌又謂治心腹中客熱膀胱間連脇下氣妨常日憂愁不樂心忪少氣東垣治一切氣霍亂吐瀉腹痛腎氣膀胱冷氣世醫專用以治婦人崩漏帶下月經不調者皆降氣調氣散結理滯之所致也蓋血不自

行隨氣而行氣逆而鬱則血亦凝滯氣順則血亦從之而和暢此女人崩漏帶下月事不調之病所以咸須之耳然須輔之以益血涼血之藥氣虛者兼入補氣藥乃可奏功也海藏云本草不言治崩漏而方中用治崩漏是能益氣而止血也又能逐去瘀血是推陳也凡氣鬱血滯必用之藥童便浸透炒黑能止

血治崩漏

主治參互

香附一斤童子小便浸透砂器中炒炒時不住手洒童便火勿過猛炒三晝夜為度川木耳四兩紙包裹以新瓦兩片夾定繩縛泥固火煨存性覺烟起良久急去火取置冷地候冷取出同香附研極細如麵每五七分淡醋湯調空心服此治血崩秘方累試有驗 交感丹凡人中年精耗神衰蓋由心血少火不

下降腎氣憊水不上升致心腎隔絕榮衛不
和上則多驚中則塞痞飲食不下下則虛冷
遺精愚醫徒知峻補下田非惟不能生水滋
陰而反見衰悴但服此方半年屏去一切煖
藥絕嗜欲然後習祕固泝流之術其効不可
殫述香附子一斤新水浸一宿炒黃同茯神
四兩爲末蜜丸彈子大每早細嚼一丸以降
氣湯下降氣湯用香附半兩茯神二兩炙廿

草一兩半爲末點沸湯服前藥 和劑局方

升降諸氣并一切氣病痞脹喘噦噫酸煩悶
虛痛走注常服開胃消痰散壅思食早行山
行尤宜服之去邪辟瘴香附子炒四百兩沉
香十八兩縮砂仁四十八兩炙甘草一百二
十兩爲末每服一錢鹽湯點服 又方香附
一斤砂仁八兩炙甘草四兩爲末鹽湯服治
一切氣疾心腹脹滿噎塞噫氣吞酸痰逆嘔

越縉

惡及宿酒不解 又方香附二十兩烏藥十
兩甘草炒一兩為末鹽湯服二錢能調中快
氣治心腹刺痛 恒 集簡方香附二兩蘄艾五
錢以醋湯同煮熟去艾炒為末醋糊丸白湯
服二錢治心氣痛腹痛少腹痛血氣痛不可
忍 仁存方香附皂莢水浸半夏各一兩白
礬末半兩薑汁麵糊丸薑湯下一二錢治停
痰宿飲風氣上攻胸膈不利 同南星等分

為末薑汁糊丸治老少疝癖往來疼痛 集
簡方香附末二錢以海藻一錢煎酒空心調
下并食海藻治癩疝脹痛及小腸氣 婦人
良方香附炒一兩荔枝核燒存性半兩為末
每二錢米飲調下治血氣刺痛 瑞竹堂方
四製香附丸香附一斤分作四分用酒醋鹽
水童便各浸春三夏一秋五冬七日淘淨曬
搗微焙為末醋糊丸梧子大每酒下七十九

治女人經候不調兼諸病瘦人加澤蘭赤茯苓末二兩氣虛加四君子料血虛加四物料濟生方香附四兩伏苓甘草炙各一兩橘紅二兩為末沸湯下二錢治婦人氣盛血衰變生諸證頭暈腹滿皆宜 獨用炒為末極熱酒服二錢立愈下血血崩或五色漏帶並宜常服滋血調氣乃婦人之仙藥也 同赤芍藥為末加鹽一捻煎服治赤白帶下及崩

漏不止 君縮砂仁炙甘草能臨產順胎九

月十月服此永無驚恐 獨用為末童瘦調

下二錢治氣鬱吐血 君川芎治氣鬱頭痛

獨用為末萊菔子煎湯早夜各服二錢治

耳卒聾閉

簡誤

香附香燥苦溫帶辛凡月事先期者血熱也

法當涼血禁用此藥誤犯則愈先期矣

胡黃連味苦平無毒主久痢成疴傷寒欬溫

瘧骨熱理腰腎去陰汗小兒驚癇寒熱不下食

霍亂下痢

唐本云大寒主骨蒸勞熱補肝膽明目治冷熱洩痢益顏色厚腸胃治婦

人胎蒸虛驚治三消五痔大人五心煩熱惡菊

花玄參白鮮皮解巴豆毒服之忌猪肉令人漏

精折之塵出如煙者
疏○胡黃連得天地清肅陰寒之氣故其味

至苦其氣大寒性則無毒善除溼熱故主久

痢成疴及冷熱洩痢厚腸胃傷寒欬嗽者邪

熱在手太陰足陽明也溫瘧骨蒸者熱在骨

間也理腰腎去陰汗者腎虛溼熱下流客之

使熱伏腎間也小兒驚癇寒熱不下食者熱

則生風故發驚癇熱在胃口故不下食也心

主五色脾胃主肌肉二經溼熱去則顏色自

佳也三消五痔大人五心煩熱者無非溼熱

在腸胃及火在五臟間也大寒至苦極清之

性能清熱自腸胃以次於骨一切溼熱邪熱

陰分伏熱所生諸病莫不消除

主治參互

蘇頌圖經治傷寒勞復身熱大小便赤如血色者胡黃連一兩山梔仁二兩入蜜半兩拌和炒令微焦二味搗羅為末用猪膽汁和九梧子大每服用生薑二片烏梅一枚童便三合浸半日去滓食後煖童便令溫下十九臨臥再服甚効 全幼心鑑治小兒疳熱肚脹

潮熱髮焦不可用大黃黃芩傷胃之藥恐生別證以胡黃連五錢五靈脂一兩為末雄猪膽汁和丸菜豆大米飲服一二十九 錢乙

小兒方訣治脾熱疳疾用胡黃連川黃連各半兩硃砂二錢半為末入猪膽內紮定以杖子鈞懸於砂鍋內漿水煮一炊久取出研爛入盧會麝香各一分飯和丸麻子大每服五七丸至一二十九米飲下 又方治小兒黃

疸胡黃連川黃連各一兩爲末用黃瓜一箇
去瓢留蓋入藥在內合定麵裹煨熟去麵搗
丸棗豆大量大小溫水下

簡誤

胡黃連氣味苦寒之至設使陰血太虛眞精
耗竭而胃氣脾陰俱弱者雖見如上諸證亦
勿輕投卽欲用之亦須與健脾安胃等藥同
用乃可無弊慎之

鱧腸味甘酸平無毒主血痢針灸瘡發洪血不
可止者傅之立已汁塗髮眉生速而繁

疏○鱧腸正稟北方次水之氣故其汁玄黑
其味甘酸平而無毒純陰之草也入腎入肝
亦入胃與大小腸善涼血鬚髮白者血熱也
齒不固者腎虛有熱也涼血益血則鬚髮變
白而齒亦因之而固矣故古今變白之草當
以茲爲勝本經主血痢及針灸瘡發洪血不

可止者傅之立已塗眉髮生速而繁蕭炳又
謂能止血排膿通小腸傅一切瘡膏點鼻中
添腦者蓋以血痢由於血分爲溼熱所傷針
灸瘡發洪血不止亦緣病人素有血熱及加
艾火則益熾矣血涼則不出榮血熱壅則生
膿涼血則自散小腸屬丙火有熱則不通榮
血熱解則一切瘡自愈腦爲髓之海熱則消
火能消物故也鼻竅通氣於腦故以膏點鼻
中使腦中熱散無邪剝蝕則腦自益矣之數
者何非涼血益血之功也

主治參互

孫真人千金月令方有金陵煎能益髭鬚變
白爲黑金陵草一種六月後收揀青嫩無泥
土者不用洗抹淨摘去黃葉爛搗新布絞取
汁以紗絹濾過入通油器鉢盛之日中煎五
日又取生薑一斤絞汁白蜜一斤合和日中

煎以柳木勿停手攪待如稀餈藥乃成矣每
早及午後各服一匙以溫酒一盞化下如欲
作九日中再煎令可九每服三十九及時多
合為佳 攝生衆妙用方取旱蓮草根一斤
用無灰酒洗淨青鹽四兩淹三宿同汁入油
鍋中炒存性研末日用擦牙連津嚥之能烏
鬚固齒又方旱蓮一兩半麻餅三兩升麻
青鹽各三兩半訶子連核二十箇皂角三挺

晚蠶沙二兩炒為末薄醋麵糊丸彈子大曬
乾入泥瓶中火煨令烟出存性取出研末日
用揩牙 又方取汁滴鼻中治偏正頭痛
同藍葉各一握油一斤入浸密封四十九日
每臥時以鐵匙點一切眼疾腎膜遮障涼腦
再摩頂上四十九遍久久甚佳亦治頭痛能
生髮 同車前草等分杵取汁每空心服三
盃治小便溺血 獨用瓦上焙研每米飲下

二錢治腸風臟毒下血不止 獨用搗汁衝
極熱酒飲治痔漏瘡發外卽以滓傅患處重
者不過三服 同鹽少許揉擦掌心治風牙
疼痛

簡誤

鯉腸性冷陰寒之質雖善涼血不益脾胃病
人雖有血熱一見脾胃虛敗飲食難消及易
溏薄作泄者勿輕與服孫真人方用薑汁和
劑蓋防其冷而不利於腸胃故也不用薑汁
椒紅相兼修事服之者必腹痛作泄宜詳審
之

使君子味甘溫無毒主小兒五疳小便白濁殺
蟲療瀉痢俗傳始因潘州郭使君療小兒多是
獨用此物後醫家因號爲使君子

疏○使君子得土之冲氣而兼感乎季春之
令以生故其味甘其氣溫其性無毒甘入脾

故入足太陰陽明為補脾健胃之要藥小兒五疳便濁瀉利及腹蟲莫不皆由脾虛胃弱因而乳食停滯溼熱瘀塞而成脾健胃開則乳飲自消溼熱自散水道自利而前證俱除矣不苦不辛而能殺疳蚘此所以為小兒上藥也

主治參互

得盧會蕪荑滑石麥芽厚朴橘皮治一切疳疾神効 又方治小兒脾疳使君子盧會等分為末米飲每服一錢 全幼心鑑治小兒蛔痛口流涎沫使君子為末瓦更米飲調服一錢 簡便方治小兒虛腫頭面陰囊俱浮使君子肉一兩蜜五錢炙盡為末每食後米湯服一錢 普濟方治頭瘡面瘡使君子仁以香油少許浸三五枚臨臥時細嚼香油送下久久自愈 集簡方治蟲牙疼痛使君子

煎湯頻嗽

簡誤

小兒泄痢有赤積是暑氣所傷禁與肉豆蔻訶子等澀熱藥同用亦忌食熱物及飲熱茶犯之即泄

白豆蔻味辛大溫無毒主積冷氣止吐逆反胃消穀下氣入藥去皮微焙用

疏○白豆蔻感秋燥之令而得乎地之火金

故其味辛其氣大溫其性無毒好古大辛熱味薄氣厚輕清而升陽也浮也入手太陰亦入足陽明經味大辛也氣大溫也宜其主積冷氣及傷冷吐逆因寒反胃也煖能消物故又主消穀溫能通行故主下氣東垣用以散肺中滯氣寬膈進食去白睛翳膜散滯之功也

主治參互

得人參生薑橘皮藿香治胃虛反胃及因寒
 嘔吐殊驗 得半夏橘紅生薑白朮茯苓治
 寒痰停胃作嘔吐似反胃 得橘皮白朮白
 茯苓決明子甘菊花蜜蒙花木賊草穀精草
 理脾虛白睛生障翳 得藿香橘皮木香理
 上焦滯氣加烏藥香附紫蘇治婦人一切氣
 逆不和 佐參朮薑橘治秋深瘧發寒多熱
 少嘔吐胃弱飲食不進良 同菹豆五味子

橘紅木瓜能解酒毒及中酒嘔吐惡心 張

文仲備急方治胃冷惡心食已即欲吐用白
 豆蔻三枚擣細好酒一盞溫服併飲數服佳
 肘後方治人忽惡心多嚼白豆蔻子最佳
 危氏得効方治小兒吐乳胃寒者白豆蔻
 縮砂蜜各十四箇生炙甘草各二錢為末常
 摻入兒口中 濟生方治脾虛反胃白豆蔻
 縮砂蜜各二兩丁香一兩陳廩米一升黃土

炒焦去土細研薑汁和丸每二三錢薑湯下
名太倉丸

簡誤

白豆蔻辛溫其治在因寒嘔吐反胃其不因
於寒及陽虛者皆不得入故凡火升作嘔因
熱腹痛法咸忌之

剪草涼無毒治惡瘡疥癬風搔根名白藥

葉如茗而

細

疏○剪草稟天地清寒至陰之氣以生故藥
器云味苦其氣寒涼性應無毒主諸惡瘡疥
癬風瘙癢蝕者以諸痛癢瘡瘍皆屬心火苦
寒能降火而涼血清熱故主之也溼熱生蟲
苦能殺蟲寒能除熱故有蟲浸酒服

主治參互

潔古專以主上部血而與牡丹皮天門冬麥
門冬同用 許學士本事方云剪草治癩瘡

吐血肺損及血妄行名神傳膏其法每用一斤洗淨曬爲末入生蜜二斤和爲膏以器盛之不得犯鐵器九蒸九曝日一蒸曝病人五更起而東坐不得語言以匙抄藥如粥服之每服四兩服已良久以稀粟米飲壓之藥只冷服米飲亦勿太熱或吐或下皆不妨如久病肺損咯血只二服愈尋常咳嗽血妄行每服一匙可也有一貴婦病瘵得此方九日藥

成前一夕病者夢人戒令翌日勿亂服藥次日將服之爲屋上土墜器中不可服再合既成又將服之爲婢覆器又不得服又再合未就而夫人卒矣此藥之異如此若小小血妄行一啜而愈矣此藥妙絕若此而世失傳惜哉中藏經治風蟲牙痛剪草細辛藁本等分煎水熱漱少頃自止和劑局方有滑肌散治風邪客於肌中渾身瘙癢致生瘡疥及

脾肺風毒攻衝生瘡乾溼日久不瘥用剪草
七兩不見火輕粉一錢為末摻之乾者麻油
調搽

簡誤

剪草大苦大寒之藥雖治血熱妄行神効若
脾腎俱虛胃口薄弱見食欲嘔及不思食泄
瀉者勿遽投之法當先理脾胃俟能進食而
後施治乃可

豆蔻味辛溫無毒主溫中心腹痛嘔吐去口臭

氣開寶主下氣止霍亂一切冷氣消酒毒東垣
調中補胃健脾消食去客寒心與胃痛。自

果部
移入

疏○豆蔻得地二之火氣而有金復兼感乎

夏末秋初之令以生故別錄謂其味辛氣溫
而性無毒海藏又云大辛熱陽也浮也入足
太陰陽明經蓋辛能破滯香能入脾溫熱能
祛寒燥溼故主溫中及寒客中焦心腹痛中

寒嘔吐也脾開竅於口脾家有積滯則痰而
為熱故發口臭醒脾導滯則口氣不臭矣辛
散溫行故下氣寒客中焦飲食不消氣因閉
滯則霍亂又散一切冷氣消酒毒者亦燥溼
破滯行氣健脾開胃之功也產閩之建寧者
氣芳烈類白豆蔻善散冷氣療胃脘痛理中
焦產滇貴廣粵者氣猛而濁俗呼草果者是
也善破瘴癘消穀食及一切宿食停滯作脹

悶及痛

主治參互

人人參養胃湯能消一切宿食開拓中焦滯
氣 藥性論云草豆蔻單用能主一切冷氣
千金方治心腹脹滿短氣用草豆蔻一兩
去皮為末以木瓜生薑湯調服半錢 聖濟
總錄治霍亂煩渴草豆蔻黃連各一錢半烏
豆五十粒生薑三片水煎服 濟生方治氣

虛痺瘧熱少寒多或單寒不熱或虛熱不寒
用草果仁熟附子等分水一盞薑七片棗一
枚煎半盞服名果附湯醫方大成亦用治脾
寒瘧大便泄而小便多不能食者 百一選
方治脾腎不足虛寒泄瀉草果仁一兩以舶
上茴香一兩炒香去茴不用吳茱萸一兩湯
泡七次同破故紙一兩炒香去故紙不用胡
盧巴一兩同山茱萸一兩炒香去茱萸不用

三味為末酒糊丸每六七十丸鹽湯下 肘
後方香口辟臭草豆蔻細辛為末含之 直
指方治脾痛脹滿草果仁二箇酒煎服之

簡誤

豆蔻性溫熱味大辛本是祛寒破滯消食除
瘴之藥凡瘧不由於瘴氣心痛胃脘痛由於
火而不由於寒溼熱痰滯暑氣外侵而成滯
下赤白裏急後重及泄瀉暴注口渴溼熱侵

脾因作脹滿或小水不利咸屬暑氣溼熱皆不當用犯之增劇

藿香微溫療風水毒腫去惡氣療霍亂心痛自木

入部移

疏○藿香稟清和芬烈之氣故其味辛其氣微溫無毒潔古辛甘又曰甘苦氣厚味薄浮而升陽也東垣可升可降陽也入手足太陰亦入足陽明經風水毒腫病在於脾惡氣內

侵亦由脾虛邪入霍亂心腹痛皆中焦不治之證脾主中焦香氣先入脾理脾開胃正氣通暢則前證自除矣蘇頌以為脾胃吐逆為要藥潔古謂其助胃氣開胃口進飲食海藏謂其溫中快氣肺虛有寒及寒鬱熱壅於上焦飲酒口臭煎湯飲之皆辛溫入肺入脾清上治中之功也

主治參互

得縮砂蜜炒鹽治霍亂 得人參橘皮木瓜
 茯苓縮砂蜜治吐瀉轉筋霍亂 得本香沉
 水香乳香縮砂蜜則辟惡氣治中惡心腹疔
 痛 入順氣烏藥散則補肺入黃耆四君子
 湯則補脾入桂苓甘露飲治中暑吐瀉 得
 木香丁香紫蘇葉人參生薑治暴中寒邪吐
 逆不止 經效濟世方升降諸氣藿香一兩
 香附炒五兩為末每以白湯點服一錢 百

一選方治霍亂吐瀉垂死者服之回生用藿
 香葉陳皮各半兩水煎溫服 禹師經驗方
 治暑月吐瀉滑石二兩藿香二錢五分丁香
 五分為末每服二錢新米汁調服

簡誤

藿香雖能止嘔治吐逆若病因陰虛火旺胃
 弱欲嘔及胃熱作嘔中焦火盛熱極溫病熱
 病陽明胃家邪實作嘔作脹法竝禁用

假蘇味辛溫無毒主寒熱鼠瘦瘰癧生瘡破結聚氣下瘀血除溼痺

自芥部移入

疏○假蘇荆芥也得春氣善走散故其氣溫其味辛其性無毒升也陽也春氣升風性亦升故能上行頭目肝主風木故能通肝氣行血分能入血分之風藥也故能發汗其主寒熱者寒熱必由邪盛而作散邪解肌出汗則寒熱自愈鼠瘦由熱結於足少陽陽明二經

火熱鬱結而成瘰癧為病亦屬二經故也生瘡者血熱有溼也涼血燥溼瘡自脫矣破結聚氣者辛溫解散之力也下瘀血入血分辛以散之溫以行之之功用也痺者風寒溼三邪之所致也祛風燥溼散寒則溼痺除矣

主治參互

得白頸蚯蚓同搗取汁解陽明經熱病汗出立已得童子小便調服立蘇血暈 千金方

治頭項風強八月後取荆芥穗作枕及鋪牀
 下立春日去之 又方治風熱牙疼用荆芥
 根烏柏根葱根等分煎湯頻含漱之 經驗
 方治一切偏風口眼喎斜用青荆芥一斤青
 薄荷一斤同搗汁於箆器中熬成膏留三分
 之一將二分日乾為末以膏和丸如梧子大
 每二十九丸白湯下早暮各一服忌動風物
 又方治中風口噤荆芥穗為末酒服二錢立

恒記準

愈名荆芥散賈似道云此方出曾公談錄前
 後用之甚驗其子名順者病已革服之立定
 真再生丹也 華陀愈風散治婦人產後中
 風口噤手足痠癢如角弓或產後血暈不省
 人事四肢強直或心眼倒築吐瀉欲死用荆
 芥穗微焙為末每服三錢豆淋酒調服或童
 中灌入鼻便服之口噤則挑齒灌之齧噤則灌入鼻中
 其効如神大抵產後虛甚則汗出而腠理疎

易於中風也 戴原禮獨行散治產後迷悶
 因怒發熱而得者用荆芥穗以新瓦半炒半
 生為末童便服一錢若角弓反張以豆淋
 酒下或剉散童便煎服極妙蓋荆芥乃產後
 要藥而角弓反張乃婦人急候得此證者十
 存一二而已 圖經本草治產後血暈築心
 眼倒風縮欲死者取荆芥末二錢七童便調
 勻熱服立愈口噤者灌鼻中皆効近世名醫

准自昇中

用之無不如神也 保命集治產後血眩暈

風虛精神昏冒荆芥穗一兩三錢桃仁去皮

尖五錢為末水服三錢若喘加杏仁去皮尖

炒甘草炙各三錢 婦人良方治產後鼻衄

荆芥穗末童便服二錢海上方也 簡便方

治大便下血用荆芥二兩槐花一兩同炒紫

為末每三錢清茶送下 活法機要治癩癧

潰爛牽至胸前兩腋塊如茄子大或牽至兩

恒

瘰癧

恒

本草經疏卷九

綠耳

肩上一四五年不能療者皆治之其効如神晉
 陵朱守仁傳云其項不能回顧用此數日減
 可如瘡爛破者用荆芥根下一段剪碎煎沸
 待溫洗良久看爛破處紫黑以針一刺去血
 再洗三四次愈用記樟腦雄黃等分爲末麻油
 調掃上出水次日再洗再掃以愈爲度 普
 濟方治一切疥瘡荆芥末以地黃自然汁熬
 膏和丸如梧子大每服三十五丸茶酒任下

藥考

九

龍木論治一切眼疾血勞風氣頭痛頭旋
 目眩用荆芥穗末每酒服三錢 普濟方治
 癢閉不通小便急痛無問久新荆芥大黃爲
 末等分每溫水服三錢小便不通大黃減半
 大便不通荆芥減半名倒換散

簡誤

荆芥風藥之辛溫者也主升主散不能降亦
 不能收病人表虛有汗者忌之血虛寒熱而

不因於風溼風寒者勿用陰虛火炎面赤因
而頭痛者慎勿誤入

蘇味辛溫主下氣除寒中其子尤良

忌與鯉魚同食生毒

瘡白菜部移入

疏○蘇紫蘇也得天陽和之氣故溫兼地之
金味故辛辛則善散溫能通氣故主下氣除
寒中也子尤良者以其善降氣也入手少陰
太陰足陽明經孟詵謂其除寒熱治一切冷

氣日華子謂其補中益氣治心腹脹滿止霍
亂轉筋開胃下食止脚氣通大小腸蘇頌謂
其通心經益脾胃煑飲尤勝與橘皮相宜時
珍謂其解肌發表散風寒行氣寬中消痰利
肺和血溫中止痛定喘安胎解魚蟹毒
子味辛溫無毒主下氣除寒溫中甄權用以
治上氣欬逆冷氣及腰脚中溼氣風結氣研
汁煑粥常食令人肥白身香日華子謂其能

止霍亂嘔吐反胃消五膈消痰止嗽潤心肺
寇宗奭用以治肺氣喘急皆辛溫能散結而
兼潤下之力也

主治參互

蘇陽草也解肌散寒蘇表辟惡之要藥 入
參蘇飲治表虛人傷風久不愈 入蘇沉丸
寶湯解利傷風寒咳嗽 時後方治感寒上
氣蘇葉三兩橘皮四兩酒四升煮一升半分

再服 又方治霍亂脹滿未得吐下生蘇搗
汁飲之佳乾蘇煮飲亦妙 金匱要略療食
蟹中毒紫蘇煮汁飲二升 普濟方治欬逆
上氣蘇莖葉二錢人參一錢水一鍾煎數沸
服 濟生方順氣利腸紫蘇子麻仁等分研
爛水濾取汁同米煮粥食之 聖惠方治風
順氣利腸寬中用蘇子一升微炒杵以生絹
袋盛於三斗清酒中浸三宿少炒食之 藥

性論治一切冷氣蘇子良薑橘皮等分蜜丸
梧子大每服十丸空心酒下又用治風溼脚
氣 簡便方治上氣欬逆紫蘇子入水研濾
汁同粳米煮粥食

簡誤

蘇葉其氣芬芳其味辛其性溫純陽之草也
故善發散解肌出汗病屬陰虛因發寒熱或
惡寒及頭痛者慎毋投之以病宜歛宜補故

也火升作嘔者亦不宜服惟可用子

香薷味辛微溫主霍亂腹痛吐下散水腫

菜部移入

疏○香薷丹溪謂其有金與水然亦感夏秋

之氣以生者故其味辛其氣微溫而無毒可

升可降陽也入足陽明太陰手少陰經辛散

溫通故能解寒鬱之暑氣霍亂腹痛吐下轉

筋多由暑月過食生冷外邪與內傷相并而

作辛溫通氣則能和中解表故主之也散水

腫者除溼利水之功也孟詵謂其去熱風卒
轉筋者煮汁頓服半升即止為末水調服止
鼻衄日華子謂其下氣除煩熱療嘔逆冷氣
汪穎謂其夏月煮飲代茶可無熱病調中溫
胃含汁嗽口去臭氣

主治參互

香薷飲有十味者有六味者有加黃連者雖
同為祛暑之藥然脾胃腎俱虛之人當以十

香薷飲

味者為準除有肺熱咳嗽病者去人參白朮
黃耆 治水腫以之為君當同人參朮木瓜
茯苓橘皮白芍藥車前子良 和劑局方香
薷飲治一切傷暑或暑月臥溼當風或生冷
不節真邪相干便致吐利或發熱頭痛體痛
或心腹痛或轉筋或乾嘔或四肢逆冷或煩
悶欲死並用香薷一斤厚朴薑製菉豆微炒
各半斤剉散每用五錢水二盞煎一盞水中

沉冷連進二服立効活人書去菹豆入黃連
四兩薑汁同炒黃色 外臺秘要治水病洪
腫氣脹食不消乾香薷五十斤剉入釜中以
水淹過三寸煮使氣盡去滓澄之微火煎至
可丸丸如梧子大一服五丸日三服漸加之
以小便利則愈宜有木同煎 外臺秘要薷
木丸治暴水風水氣水通身皆腫服至小便
利為効用香薷葉一斤熬成膏加白朮末七

身腫
香薷

兩和丸梧子大每服十丸米飲下日五夜一
服 肘後方治心煩脇痛連胸欲死者香薷
搗汁二升服 聖濟總錄治鼻衄不止香薷
研末水服一二錢 肘後方治舌上出血如
鑽孔者香薷煎汁服一升日三進 千金方
治口臭香薷一把煎汁含之 食醫心鏡主
心煩去熱取煎湯作羹煮粥及生食亦得
子母秘錄治小兒白禿髮不生津出慘痛濃

白禿

煮陳香薷汁入猪脂少許和胡粉傅之 衍
義云治霍亂不可缺用之無不効 雷公云
凡採得去根留葉細剉曝乾勿令犯火服至
十兩一生不得食白山桃也

簡誤

香薷性溫不宜熱飲故治乘涼飲冷寒與暑
氣相搏激是陽氣為陰邪所遏以致頭疼發
熱惡寒煩躁口渴或吐或瀉或霍亂者宜用

此藥以發越陽氣散水和脾則愈若夫飲食
不節勞役斲喪之人傷暑熱而病大熱大渴
汗泄如雨煩躁喘促或瀉或吐者乃勞倦內
傷之證宜從東垣人參白虎湯清暑益氣湯
桂苓甘露飲之類以瀉火益元可也然中熱
不吐瀉者宜人參白虎湯吐瀉者宜清暑益
氣湯桂苓甘露飲設用香薷是重虛其表而
又濟之以溫則誤矣蓋香薷乃夏月解表之

藥表無所感而中熱為病何假於此哉誤則損人表氣戒之戒之

薄荷味辛苦溫無毒主賊風傷寒發汗惡氣心腹脹滿霍亂宿食不消下氣煮汁服亦堪生食

以汁發汗大解勞煩

菜部移入

疏○薄荷感杪春初夏之氣而得乎火金之味金勝火劣故辛多於苦而無毒潔古辛涼浮而升陽也入手太陰少陰經辛合肺肺主

皮毛苦合心而從火化主血脉主熱皆陽臟也賊風傷寒其邪在表故發汗則解風藥性升又兼辛溫故能散邪辟惡辛香通竅故治腹脹滿霍亂食療以為能去心家熱故為小兒驚風風熱家引經要藥辛香走散以通關節故逐賊風發汗者風從汗解也本非脾胃家藥安能主宿食不消上升之性亦難主下氣勞乏屬虛非散可解三療俱非明者當自

別之

主治參互

風熱上壅斯為要藥 入噲化丸以之為君
 主陰虛肺熱咳嗽甚良加生乾薑并治傷風
 寒咳嗽 佐漆葉苦參何首烏胡麻仁荆芥
 穗生地黃蒺藜子石菖蒲蒼朮治大麻風去
 蒼朮加赤莖豨薟治紫雲風 同貝母荆芥
 穗玄參斑猫佐肥皂能治癩癧 外臺秘要

治水入耳中擣汁滴入立驗 孫真人用以

辟邪毒除勞氣令人口氣香潔煎湯洗漆瘡

日華子用以治中風失音吐痰 蘇頌主

傷風頭腦風通關節及小兒風涎為要藥

東垣用以清頭目除風熱故可療風瘙癢瘡

及塗蜂螫 簡便單方清上化痰利咽膈治

風熱上壅以薄荷葉為末煉蜜丸芡實大每

噲一丸 醫學集成治舌胎語蹇薄荷自然

汁和白蜜薑汁少許擦之。明目經驗方治眼弦赤爛薄荷以生薑汁浸一宿曬乾為末每用一錢沸湯泡洗。濟生方治癰癧結核或破未破以新薄荷二斤取汁皂莢一挺水浸去皮搗取汁同於銀石器內熬膏入連翹末半兩連白青皮陳皮黑牽牛半生半炒各一兩皂莢仁一兩半同搗和九梧子大每服三十九丸煎連翹湯下。張杲醫說療火毒生

瘡因炙火火氣入內兩股生瘡汁水淋漓者用薄荷煎汁頻塗立愈

簡誤

病人新瘡勿服以其發汗虛表氣也咳嗽若因肺虛寒者之而無熱證者勿服以其當補而愈也陰虛人發熱勿服以出汗則愈竭其津液也脾氣類傷寒勿服以其病在下而屬脾故也血虛頭痛非同諸補血藥不可用小

兒身熱由於傷食者不可用小兒身熱因於
疳積者不可用小兒痘瘡診得氣虛者雖身
熱初起亦不可用

商賈本草經疏卷之九



